

PAS Kelantan buat perubahan besar
Malaysiakini.com
June 18, 2011

Badan Perhubungan PAS Kelantan hari ini membuat rombakan besar dengan menampilkan muka-muka baru bagi memantapkan lagi organisasi parti itu.

Walaupun, tiga jawatan timbalan pesuruhjaya PAS dikekalkan, namun Menteri Besar, Datuk Nik Abdul Aziz Nik Mat selaku Pesuruhjaya PAS Kelantan menukar ADUN Kelaboran, Mohd Zaki Ibrahim sebagai Setiausaha PAS negeri dengan ADUN Pulau Chondong, Zulkifli Mamat.

Tiga timbalan yang dikekalkan itu adalah Timbalan Menteri Besar, Datuk Ahmad Yacob, anggota exco kerajaan negeri Datuk Husam Musa (kiri) dan exco Mohd Amar Nik Abdullah (kanan).

Nik Aziz juga mengumumkan ADUN Pengkalan Pasir, Hanifa Ahmad dilantik sebagai Bendahari PAS negeri yang baru bagi menggantikan Datuk Anuar Tan Abdullah.

Bagi jawatan Pengarah Pilihan Raya PAS Kelantan, beliau memilih setiausaha politiknya, Wan Nik Wan Yussof yang juga seorang sarjana sains politik bagi menggantikan ADUN Bukit Tuku, Abdul Fatah Harun (kiri).

Jawatan Ketua Penerangan tidak berubah - Dr Mohamad Fadzli Hassan kekal selepas dilantik tahun lalu.

Mesyuarat Perhubungan PAS negeri yang pertama kali bermesyuarat selepas muktamar parti itu juga melantik tujuh ahli jawatankuasa baru iaitu Ahmad Fadhli Shaari (Setiausaha Akhbar Menteri Besar), Datuk Takiyuddin Hassan (Exco), Datuk Anuar Tan (Exco), Hisham Fauzi (peguam), Senator Mumtaz Mohd Nawi, Hussin Embong (AJK PAS Gua Musang) dan Datuk Dr Johari Mat (ahli akademik).

Ditanya mengenai pilihan raya umum ke-13, Nik Aziz mengulangi pendiriannya untuk mempertahankan kerusi DUN Chempaka jika kesihatannya mengizinkan.

"Kalau saya sihat, tenaga saya ada, InsyaAllah (akan bertanding)," katanya.